



Gion Antoni Giossi-Berther, 1912 - 2006

cb - Gion Antoni Giossi ei naschius ils 17 da matg 1912. Carschius si e staus eis el - cun ina pintga interrupziun el temps d'emprendissadi - adina a Rueras. Cheu ha el frequentau las scolas primaras ed a Camischolas la secundara. Malegiar e geometria fuvan ses roms preferi dils quals el raschunava bugen aunc en ses vegls dis.

Cunquei che siu bab fageva il scrinari eis ei da supponer ch'il Toni ha buca giu grev da sedecider tgei mistregn emprender, aschia ch'el ha era empriu da scrinari sco lez. Cun premura e bien success ha el frequentau denteren la scola professiunal a Cumpadials ed acquistau a Cuera igl atun 1933 il diplom sco scrinari qualificau.

Ella scrinaria da siu bab che veva baghegiau quella entuorn ils onns 1900 ensemens cun siu frar Vigeli Giusep, il pot da Rueras sesenteva il «Toni Christ» - sco el vegneva numnaus dils da Rueras - da casa. Sco scrinari diplomau ei il Toni semess els stadals e ha luvrau tierquella pintga interpressa tochen igl onn 1943. Quei onn ei igl aug Vigeli morts. Da lu naven ha el surpriu il menaschi en atgna regia e tgamunau quel entochen igl onn 1959. Ins sa s'imaginar tgei curascha ch'ei ha duvrau da far quei pass cun quei ch'ils onns duront e suenter l'uiara tochen tier la conjunctura aulta ein stai dirs. Lavur dev'ei avunda, el mistregn ni dasperas, ils raps ruclavan denton buca ual aschia da casa en, ins stueva esser spargnus e tener bein a quen la lavur fatga.

Per segirar l'existaenza ha il defunct menau sper la scrinaria in mudest puresser. Zacontas cauras, in triep nuorsas ed entgins pors furnevan ina part dil da viver ed in bi letg purschals purtavan raps currents, pertgei ils purs pagavan pér igl atun las lavurs da scrinari. Quei tut ha purtau ina mudesta, mo beinvegnida resursa supplementara.

Igl onn 1937 ei nies defunct sospusaus cun la giuvna Catrina Berther da Rueras. Enteifer 13 onns ei la famiglia carschida sin 10 dels. Quater buobas e sis buobs han dau lavur e fastedi, denton era bia legria e satisfaciun. Trer si in'aschi gronda famiglia pretendia da segidar in cun l'auter e tschaffar en dapertut nua ch'ei fa da basegns. Aschia san ins s'imaginar ch'ei ha era tuccau alla Catrina da semetter els stadals per dar damogn a tonta truscha.

Igl onn 1969 ha nies defunct surdau il menaschi en mauns pli giuvens. Treis onns pli tard ha siu fegl Calist surpriu il menaschi puril ch'era serefatgs pulitamein, ed ils geniturs ein serendi orasissum il vitg Rueras. Buca ch'il Toni fuss staus lischents e schau dar las auras pils larischs. Na, na, da gliez vess sia cunscienzia mai schau tier. Luvrar, spargnar e segidar nua e cun tgi che ha da basegns era obligaziun. Aschia eis el segidaus en scrinaria cun ses fegls aschi ditg sco el ha mo saviu ed igl ei stau da responsar.

La mort da sia consorta Catrina igl onn 1993, e la mort dil fegl giuven Teofrid igl onn 1998 ein stadas grevas fridas pil defunct. E tuttina ha el acceptau il destin e buca semess a bandun. Cun empau agid dils ses ha el bia onns fatg la gronda part dil percasa e sespruaus da buca esser in buordi pils auters. Cun sesez era el consequents ed il pensum quotidian serepeteva di per di sco in'ura. Mo plaunsiu han sias forzas schau suenter ed el ei lu sedecidius per la casa da vegls.

Suenter mo 6 meins dimora ella casa s. Vigeli a Sedrun eis el sedurmentaus en ils 13 da zercladur - il di da sogn Antoni - per adina. Ina veta cumplenida cun lavur e quitau per ils ses ei ida a fin.

Lein tener el en buna memoria.